

藏

密

齋

集

藏密齋集卷之二十一

嘉善魏大中孔時著

書牘八

答丘太丘

川湖餉院

方其卽之而不能以時卽也迨離索而感夫卽
時之不能以時此情倍切于時卽之而離索時
之念及之聊舉以似台兄然歟否也近事堪詫
邸報中當得之弟行矣與台兄常相離而無望
其暫相卽矣乃山坳樹底鳥語花香霞蒸煙靄

間不足睹我兩人之文章與其習次耶若夫片
語隻字流落人間把玩長哦較之相對饒有餘
情也

甲子五月初二日

上趙冢宰

呼吸霜露呼吸帝座矣斥劉登許朝士有大獄
之憂以爲行且煅煉汪盡清流而周內之也凡
有聞者皇皇相告無可奈何亦直聽之而已命
不敢以不聽義亦唯有聽命也翁臺嘗諾先人
以墓門之石得系之銘中死不朽實紀再上摘

稿則中徃年罪案茅簷草則豚犬舊業耳不足
奏記室也浮丘來札奉覽可可否否惟翁臺獨
裁之

甲子五月初二日

答吳師每。

杭嚴道

燈夕之譁流傳京師咸惴惴于軍之不可戢是
慮而不肖以老公祖在省會足仗也多事之國
卽俸及榮遷第宜近借而當事者不圖其憂不
使終惠吾浙而遠置之獨不虞吾浙之民之失
乳乎人之與時宜也時宜我我亦宜時顧時之

宜我當觀其爲何如時我之宜時又當觀其爲何如我此其際微矣此其際危矣適有違時之感辱教及之遂以相質高明以爲何如也

甲子

五月初二日

答翟凌玄

廷綏撫院

辱惠書匆匆久不報罪甚罪甚適者僉夫通竈援以傾吾黨勝着卽其敗着而有世道之責者欲徐徐而聽其自敗煉石者以俟後之君子斷齧立極其在台臺乎廉其剝吾軍吾民者而吾

軍吾民不至于罷困而不聊生所以鞏吾金甌
也由是而燬上星辰煉石者仍又俟之台臺矣
不肖固已入枯魚之肆矣

甲子五月初四日

與劉東卿

斗城中交臂而失賢者徒令慕義無窮也一葛

志嚮往不盡

甲子五月初四日

與王臨臺

高義無窮誦義亦無窮頃拜魚酒之惠感感媿
媿葛一端茶一缶皆南物奉以備暑幸鑒入

甲

于五月初四日

答李太衡

浙江按院

溯脊脊多事矣老公祖下車而賜溯以無事之
福中朝脊脊多事矣而不肖褊衷取戾以櫻兇
人之鋒不肖殆難乎免于今之世其荷庇得免
而歸享無事之福恐不肖福薄不可幾也徃舍
親岳石帆在都每聚首而傷敝邑之民之寃舟
至濟作各公祖父母書貽不肖索私記以上各
公祖父母爲諸士民請命却老公祖之惻然而

議救也。敝邑康令公之品之政計，老公祖無不耳而目之矣。卽振刷漕弊一事，貽惠敝邑不小。秋闈得與內簾之選，則區區治民之私所仰丐于老公祖而不能自己者也。

甲子五月初四日

答王



山東撫院

不肖以多怨多忌之人，處多枝多求之地，屢多凶多懼之機，原非其據取矣。實應而尊者收斷木而青黃之，耶感媿感媿輦下竿牖之效，厥閭閻之血掣撫按之肘，顧譽者失之，誹者亦不甚。

失也台臺不寄視聽于樂趨承之司道便居間
之鄉紳而民好好之民惡惡之虞貪吏之百足
耶

甲子五月初五日

答徐玉臺

神木道

蕭寺相對竊聆臺下所斷斷而不少假者私附
于臭味焉已微聞有噓其燼者因緣舊雅候台
旌于城外一審動定爾時意色卒卒不及吐闕
焉至今邇廟堂之上方擬所以酬功會有急易
者遂以神木重臺下已臺下得神木又舍易兩

不居旋又于他地數急之數舍之顧爲封疆擇
人非臺下能勝任而愉快乎封疆幸甚封疆幸
甚別諭憑限至情不敢以不體然神木三面臨
虜築戟久虛得毋生虜心舊限頗迫今將十月
爲期也台貺過腆卽爲借花之供得無笑其不
虔乎 甲子五月初五日

答盧婺源名化鰲

徃者步趨棘寺心儀允臺之端凝而瞠乎其後
也乃糠粃之質簸之颺之而尚勞允臺于簿書

譬如冢婦寧能借三日新婦促促事小姑娘厨下耶乃龍德愈潛鴻儀益著卽計後高才捷足者應不下十百人步趨恬養而不益墮乎其後耶世風囂競反此惟恬當事者豈得以兄臺之恬而遂恬處兄臺也

甲子五月初五日

上趙冢宰

微聞正論以翁臺之去畱爲語默然則翁臺之去畱固士氣之盛衰所係也勉一暫畱可乎

甲

子五月十四日

又

開內持沈刑垣章甚急小疏急必且累沈姑需
數日耳

十六日

答沈泰垣

南司空

吾鄉之以次當開府者靳之而不卽予也不得
已而予之則在遠也以次當卿貳者靳之而不
卽予也不得已而予之則又在南也唯其遠也
無耳目口舌以分用其心思而功靡不成唯其
南也若四徽之布四維不與爭于中土而得以

莫其位然則遠者南者乃吾鄉之福而翁臺又
享福之全者乎夫天下之有道有才有識者必
藉有福之鉅公統領之况有福而又身有其道
其才其識乎 甲子五月十五日

與黃石齋。

念吾丈侍太夫人讀書樂志自愉快也早間赤
城持丈詩箋見示黃口何知與商微義耶弟迺
自悔其蝨之不深也謝謝乍得董字付之表工
不善致墨瀋淋漓可惜迺其意思都在乞題數

行于後聯爲雙壁吾丈許之乎

甲子五月廿五日

答吳本如劉遠總督

天下事集於賢者智者而賢者自賢智者徂智
秦誓所以貴一个臣謂其妙于用賢用智也翁
臺忠誠以立本賢者智者默就翁臺之用而不
知以入妙而大疏所條首務者急着者定策者
官方者無不可以按券而取償矣事乃無不集
矣賀賀不肖多尤多悔之身原不宜處多忤多
求之地而俸序所及繒繳隨加懾息譸張誠如

二ノ言月
大教夫成大事者必不先示人以意而啓人之
忌苟有以懼之而啓其壽張則其不妙不妙也
亦甚矣顧得與左浮老竝勅古人所以幸李杜
齊名而無憾者也

甲子五月十五日

答周纘唐

今日病在內矣年兄以爲不在內在我我委之
而彼收之弟以爲我導之而彼乃弄之也年兄
初催相傳爲彼宗扼之弟猶疑爲齊東語今題
益信年兄慮世情之去而舍之夫不有去去而

逐之者耶弟視年兄得請志并僂弟未卜所稅
駕也 甲子五月十五日

與顧海揚

部覆得藉手以報命矣疏具別楮呈覽不肖竊
不自揣艸一公書稿邀岳石老爲吾邑之士民
擬赦忻然不鄙謂不肖開誠剖公挈而遊于慈
綵同好之途自三院兩司以及府縣各公祖父
母一一作書一通從濟走价復如京師致不肖
令一一轉致不備三縣鄉尊恐圖書難于徧索

也省下諸公祖業從報房郵致矣道府廳縣煩
台臺擇一妥人各致之儻方且翁已行勞掌記
另易一簽也

甲子五月十六日

與康味澹。

土公祖緘老父母所條革滿山弊見示讀竟爲桑
梓加額老父母德意不獨在善人且溥及三吳
矣而又爲善人報德于無窮祀章父母于名宦
也感甚感甚岳石帆偕不肖作公書達諸公祖
父母爲吾邑士民擬赦其意甚厚其機難再茲

事勞神已久乘此力與開釋老父母又一番德
意在敝邑者千萬年也不肖于鄒匪石無交夙
知其賢間一稱于冢宰其調之銓部則冢宰意
也夫爲貴鄉達一久滯之賢者爲貴鄉添一破
格之司官而以此開罪設老父母有種種德意
在敝鄉寒家子姓稍能文者輒荷垂青不肖不
以爲德反以爲怨老父母許之乎王公祖風采
嶽嶽畱心吏治必有以知老父母者老父母亦
自有以致王公祖之知漕兌其一端矣不肖書

嘗以循卓冠兩浙爲懇要其間相知處必不以
書也李公祖書來不肖卽附及秋聞事有老父
母資望在不顧其言輕如絮矣

甲子五月十六日

答岳石帆。

昔韓昌黎之在京城唯是與已合者從之游而
遂以不戮于人爲幸夫如是不肖之在今日豈
徒足以致謗而已哉皎皎白駒繫之維之庶永
朝夕砭我謬迷而吾道南矣北何如南之安未
可謂天之無意于吾黨也桑梓一案照之白日

覆以慈雲感幸感幸諸公祖父母書一一如命
郵致便間祈更一及之曠然而示天下以無町
畦也佳葛見惠懼屢拂尊者高情謹拜使命之
辱服之無斃顧何以爲報耶不肖納履而去直
須時耳致費伎者大力協以竈援不勝惶懼丘
櫬荷雷神併謝

甲子五月十七日

答徐肩虞

山東右布政

有一不忍出于口之語而無奈世之日似之世
何似似盡入于陰濁中何以券之曰凡帶有陽

明之氣者于仕途輒不利臺下試閱長安中之
善仕者有夫口見喉如臺下者乎暨如不肖者
乎而幾其入仕途而無窒也

甲子五月十七日

答王梅和

憶借諸虞工斷斷而商鐵價乎試一轉盼亦復
何益真足自笑別更裘葛時入夢思每見天南
五色雲起輒把酒酌地曰敬亭山下有良二千
石其人如玉也長翰見懷宛如疇昔浣慰如何

甲子五月十七日

答魏振夷

寧夏撫院

風欽臺下之嶽嶽于西臺也進而就之而一以爲岳峙一以爲淵渟退而信爲偉人不可誣矣銀夏重鎮委以長城瞭望所及得直出賀蘭山外西至鎮番乎晉國亦仕國也而孫拱老不卽來元白以巡方出雨蒼憂居徒令孫玉老領襄于此臺下盼中朝能無晨星之歎乎

甲子五月二十日

答翟凌玄

延綏撫院

延天下精兵處也乃抽調單虛如台教云云耶

無補于東而西受其憊延亦非無事之國矣實
伍儲糗糶繆牖戶知有長策鬱爲長城四郊多
壘所在生心而赤地千里時復見告可若何不
肖以冷面熱腸爲世詬病圖歸未能荷貴鄉諸
先生嶽嶽而論天下事也

甲子五月二十日

答周斗垣

浙江左布政

不肖十四年于宇下譬如艸木萌芽鬯遂于光
天化日甘雨和風之中而不自知老公祖不以
無知置之長翰雲委布其腹心資望日崇攀

無計艸木無知乃始有焦枯之色矣顧念徃者
敝邑因公註誤諸生屢沾德意出之更生位日
高澤日遠將十四年所卵而翼之者先被焉猶
是光天化日甘雨和風之中矣時方媚竈當爲
逐臣不肖不得侍杖屨于茲也

甲子五月二十日

答吳生白

富貴利達萃于長安東西南北之人竭知畢慮
寒于是暑于是風雨晦冥于是而台臺以一介
之使爲微累其生平之恬世安得此長者之言

而誦之不肖所以愈心折而不能自己也觀天之道厚祿每與厚德相配如名山山覽勝優游歲月橫看成嶺側看成峯景過臥思尚有餘味苟非然者如登浮屠躡級而上悸急喘乏已覺困頓一霎及嶺眼界雖寬實無餘地可以駐足疾趨而下勢所必然履上星辰坐鎮雅俗以此易天下可矣不肖薄德又弗論也

甲子五月二十

答陳令威

山海理刑

關門見長之地亦叢忌之地百惟慎重弟方爲

世詬病而效其喋喋可笑也

甲子五月二十日

與徐永平

名廷松

譬之真金烈火煅之金色逾顯凡剗薦者必爲
台丈另列數行不卓然雞羣乎不肖今亦在洪
鑑中顧何以自見也敝同年陳令威理刑關門
而列銜得與賢者同署因衡久矣思翹然一見
其奇其人非無奇者惟台丈一左右之

甲子五

月廿一日

答高浦城

名欽爵

弟正引疾求罷而長翰雲委有朴愚任事不能
圓轉諧時之苦誰謂荼苦其甘如齋矣竊俞不
以其愚成事歟人皆曰予智自壯迨老咄嗟萬
變弄一世精覓耳一事無成也苟存一諧時之
意是非臧否不無詭隨七尺之軀所須于世幾
何而出違心之言爲疚心之事義之與比而已
時之諧不諧可弗問也爵位有生而定之矣年
兄德量才氣福澤百倍于弟必不至如弟之不
諧于時異日一丘一壑間仰年兄爲大廈也

于五月廿一日

答方莸未

時名花者偵其蓓見其且飽且蕊且放也日幾
幾焉且沽某酒且觴某客而盲風妬雨夜半陡
作瓣瓣沾泥矣盲者妬者不知夫開者之光景
原無多也當年過從俯仰歎歎宛然在目弟豈
意至今日耶則弟之去已晚矣吾兄淡心熱心
慮弟輕走或致所傷者多弟何敢輕畱然亦何
敢輕走矣至仁兄出處全而出必有恃者以議

其後全而處出山以何日耶熙宇欲關攸者之
口而又爲天下思急得况之用故有前議不敢
不商量停當也承千里命使之雅敬布爾言諸

圖嗣報

甲子五月廿一日

與鹿輒獄

不聞問者三年夢寐縈思者亦三年矣詢相知
云老兄健飯也天厭夷氛巖關安堵老兄雍容
緩帶嘿豫帷籌勞而不居怨亦希有羨羨弟不
才冷面熱腸爲世詬病貽知己憂其何以起弟

之沉疴乎貴同年陳令威弟鄉舉同門也困衡
久矣思一翹然自見其奇今日侍左右其穎立
見司馬相公必有所試矣

甲子五月廿一日

答李翼軒

南太常

捧讀大疏織委曲當三百三千發育萬物道之
所以優優也兩都解額論尤不易矣南少宗伯
卽宜借重不肖方爲世詬病不敢開口言事將
無後來者復居上耶幸無生不同時之嘆末緣
一拜函丈殊愧生平日晚荷庇見放行歌而南

不知得慰茲願否也

甲子五月廿二日

答湯

名啓外

尊公嶽嶽焉于羣陰中人心得以常且而不夜
辛亥共事諸公不肖幸及事安邑幸及事孟津
而尊公遂長抱不測時之慨矣去冬議郵方以
尊賢一念不勝守禮之思愬焉終古猥厯孝思
謂不肖嘗與有贈官之議遠辱使命何以克當
原脫附壁併致區區怒知之思不

一甲子五月
廿二日

答郭旭陽

南直松院

舊京控納皖蕪屬引淮泗綿絡吳會屠狗說劍
不獨生心時且瞑目消弭防護百倍徃時天祚
江南得借台臺持斧一方幸有寧宇而廣德長
興叢山巨浸易于數盜文移徃反動且經時此
中非鎮以備兵使者常潮廣德竝受節制盜朝
發而夕捕之舊京未得安枕也

甲子五月廿二日

答蔡中山

久仰德風未沾化雨郵亭獲對稍慰飢渴卽未
盡讀先生之書聆教有時日之久而大旨似以

明明德于天下爲宗以致知爲竅學非宗此不全學非此竅不靈恍然如有省也所委不敢辭俟卒業當有以請未敢鹵莽以報謹以謝復容再申候不盡

甲子五月廿二日

答方鉅野

名時化

聞尊公之風廉百世之頑而起其懦矧入小學時嘗過甘棠之下乎讀遺編掛山立海磅礴一世之氣恍如遇之門下遂于易進乎解矣四十年而後鉅野之民有如僕者生焉其仰門下如

僕之于尊公也原貺附壁篤誦心載之矣

甲子

五月廿三日

答吳濂菴

八九品馳恩得及其母冢宰所以普聖澤而慰天下之孝思也尋以非制且議止當亟爲先生圖之不肖行自當以其未竟事轉屬于相知不敢誤也

甲子五月廿四日

答周綿貞

應天撫院

台教謂士君子不可一日無爲國心又不可一

日無去國心立千秋著鑑中當世齊育矣又念
及割離名位者之難其人爲之汗泚又念同志
諸人不可不始終有以聯絡之爲世道意甚盛
夫不能割離名位而能爲國而能去國耶其聯
絡之亦必以名位設其意在北而僅得南聯絡
弗得也北矣卿貳矣意在銓院而僅得他曹聯
絡弗得也豈惟弗得而聯絡舌劍唇鋒造言成
虎噬竈得煙遂成烈焰其可嚮邇歟某公急北
北亦急得某公執牛耳不肖罷免後繼以某某

陞後復召某部署已定志得意遂矣獨恐又有
挾茲術以圖遂其欲者此異日台臺之憂也我
躬不閱皇恤我後

甲子五月廿四日

與黃石齋

麤卷子奉上求書先人行實及贈弟入洛茅簷
卿三詩爲第三徑之資董卷以暇了之墨四笏
筆十矢茶一缶揮翰時所有事焉者也

甲子六月
月初一日

又

適走介而使者至三復瑤篇發人漢省異日當
別裝一軸也更有所請得無婪甚非以撻奇歸
之學道要不我外耳

甲子六月初一日

與孫若英。

事既煩瑣煩瑣中又多鬱伊而以閤躁不耐事
之人當之愈見其煩瑣鬱伊也銓中諸公既不
相習其筦選者爲徐徐近日始見其投一刺不
知作何面孔老兄履歷呈內便當註明准監字
義弟甚拙苟遇不相知之人必不能開口奈何

奈何弟處此有年其在京師而無意與弟相識
者是非弟可得而開口之人也已矣世道可歎
如此老兄想不見報時事殊紛紛也

甲子六月

初一日

與楊大洪

微聞有警動此何消息也疑是山鬼伎倆耳以
不聞不見應之何如病不得叩懸懸

甲子六月
初二日

答鄧壺丘

順天撫院

風欽台臺之績學與其奇文與其偉畧當世之

正人君子又視台臺之出處爲消長也而棠陰不遠荆識未緣仰止之私可勝忉怛今日而台臺得用于國家國家今日而乃得台臺之用矣
剗之鞭不可以及關而不可以不及關關暇蘄能自爲堅乎其令關以東默默焉受台臺之繼
縱而不自知無其功無其名而有其効所以高于天下功名之士也不肖無識獨生而向徃天下之賢豪于貴鄉尤摯迺今日以向徃貴鄉之賢者開罪于貴鄉台臺以爲何如

甲子六月朔

三二
答侯休寧

名安國

向百口而道臺下者近有百身莫贖之嗟其毒
發于其鄉之人幸臺下一護其家覆巢之下得
有完卵幸甚幸甚其得脫于虎口也必有以報
臺下其不得脫于虎口也臺下之德不朽台既
順使附壁謹謝使命之辱

甲子六月初三日

答李緝敬

每一疏至輒與人以為善之利如百昌茲茲矣

欣焉于煦日和風之下弟緇衣之好不敢後人
無論無嚮利之德且欲得而甘心焉伊川云此
是願不及家兄處天限之矣

甲子六月初三日

與孫若英

弟昨有小疏上不逾刺 內中怒甚傳降二級
果爾則背驢風色不負生平矣

甲子六月初六日

答田平鄉

名岷

入都餽遺者屢有暴客之警而此風不戒蓋託
在都下者其志甚于暴客也不肖攜二三童僕

于此足餽其口而止不敢復爲暴客積台既
壁伏祈鑒原想不肖于旦晚間亦得遂初衣志
願矣

甲子六月初六日

答樊鐘陽

兩淮鹽院

弟不勝緇衣之好于貴鄉尤摯乃以此取戾于
天下卽以此開罪于貴鄉卽罪不可赦還弟初
衣之矣必欲中以奇禍何也弟殊不解年兄解
之乎

甲子六月初六日

上朱平翁

翁臺明明白白言者之意不在翁臺翁臺亦無
可得而言也註籍則手法畧重矣舉朝正人瞻
仰殊切伏祈裁幸

甲子六月初十日

答徐永平

名廷松

屢詢功部第有樞輔及潘彭二公薦解疏無參
疏也無參疏則無容覆矣薦疏固不必覆也原
疏想下農部未嘗咨送耳同疏異覆蓋另有參
疏可以藉手也門下第一意以圖畿輔無自疑

甲子六月十三日

答張蓬玄。

像教非古也而廟之貌之足以聳流俗瞻忠愍
集前遺像生氣凜凜令人作顫容城祠像直土
本形骸耳不肖不如不爲也翁臺此舉功在人
心章其祖之烈不遂其孫之惡定興令亦賢矣

甲子六月十三日

答唐宜之。

弟福已甚其及于人言固當但若曹悉力羅搆
無一罪狀可以指實茲足慰遠念耳弟歸無再

計目前尚未得自繇緣若曹通奧舞械數示不
測二三君子皆重足而立近李懋明至稍有商
量若曹諱其通奧之名曰此吾莫可誰何則究
竟未卜也禱晴文惻然仁人之言有田不以爲
食而以爲累無惑乎日稱招撫日稱開荒而黃
茅一望如故也跣跣者望中都而思以爲利利
可必得耶微聞守土者峭厲不可近而行兄之
言是兄之道行也幸甚幸甚以戢盜爲職而因
以爲戒兄必有道以行乎其間有戒心無廢職

日可券也而問道于盲乎今日迺得睹頽上列
灑然神動詩筵颯颯出入懷亦可勝登想聞孟
旋欲奉太夫人于信建間而缺不可得頽缺出
矣不知可遂合璧之願否弟言不行亦非弟有
言時也孩未意氣薄霄漢善其人殊不寂莫然
廟堂之上卒未有以破其寂莫也奈何奈何

子六月十三日

答韓蠡縣

名光先

徑渡白溝而北與經畧入遼之行會燈火林木

中車馳馬驚矣而分隙握手爲杯酒之懽雅意
迄于今不忘廼年允猶屯邇州縣而弟以糠粃
之質數爲世詬厲雖荷庇猶旦夕于此特未有
聞耳得間卽拂衣而南矣時方多故台莖日隆
必借重爲掖垣之光爾時弟子林壑間想莖丰
采恐不及追隨步趨也台旣附壁不盡依依

子六月十三日

答喬獻蓋

福建按院

海有積盜事有積瑕案有積牘台臺半臥治之

種種就緒以及生平緇衣之好而人情之蔽賢也甚于君子之惡不善所伎在此故摘其微可以藉口者爲口實時事從可知矣

甲子六月十三日

答王中認

定與令

忠孝墓祠之舉功在千百世之人心作成人才于不識不知中嘿嘿有所興起此濟世第一義也至不以愛屋之故縱其孫爲梟更仰天地之公露雷之用矣錫山復出一名儒國家復得一正人也

甲子六月十六日

答馮禮亭

宣大總督

中州腹也而東土之妖陡焉發難幾于危邊賴
台臺曲突徙薪中州安于覆盂宣大邊也四郊
多壘所不蠢蠢思動者幾希矣其賴曲突徙薪
之圖更亟妖幸有殄絕之時虜固與宣大終古
也不肖非劣無狀以資俸序竊處非其據方思
乘間抽簪讓賢者路濫蒙獎及惶仄殊深中州
之材與宦于中州者之材否一一領教當事者
行奉以進退也

甲子六月十七日

答趙儕翁

乞得翁臺大章爲先人不朽不肖胷中無事矣
才從外歸耳畔紛紛消息都惡始憂白馬今憂
甘露矣抑有不忍言者不幾有受制家奴之慟
乎舉朝望翁臺甚殷何以慰之

甲子六月二十日

答錢昭自

時事日非弟歸無日得歸亦是背驢風色耳恐
不能乘畫鷁也片帆亾恙高掛秋風此倖可微
行圖再假萬勿我斬辱訊懸緣之命生機死法

總不可知然什九是死矣元方心在世中身在
事外綽綽餘裕慕其超然以弟之知兄臺急兄
臺而不能一爲援手而譟弟者以爲與于銓政
世卽不知兄臺能知人言之誣也目前紛紛如
蘇所委不敢忘伺機緣圖得當以復然未知如
何也

甲子六月廿一日

答錢御冷

權璫之殺朝士蓋通權璫者赦之然則殺人者
與殺于人者其是非必有分矣范忠宣之論論

同異未論是非是非出而士乃始知舍生而取
義也如何如何家鄉諸事捧讀尊教如列眉矣
獨滂雨匝月民將無天可奈何舉世競進獨舉
恬者爲有罪舉者之累人如此乎王者久知令
弟才更得有噓之于司官者可全收也弟幸于
是非處稍有一隙之明故入紛不亂然轉羨年
兄之超然矣

甲子六月廿一日

與趙儕翁

徽省臬長公祖劉公可法與中絕不相聞而誦

其清執者如出一口不謂其資俸已及忽有閩
中右轄之擢也適敝省亦有右轄之缺補程公
祖寰矣及今未任以程更閩以劉畱湖一爲轉
移便益無算忝竊于此而爲一絕不相聞之公
祖就其所已得之官少畱其清執于地方或非
分外事也可以命司選者一爲轉移否適方公
祖應明以數行見遺奉覽其意全不在湖可爲
絕不相聞之證併可以見中之區區爲地非爲

人也

甲子六月廿三日

答魏元白

山東按院

往時小人之傷善也逐之而已今且必殺之往
時小人之傷善也恃其徒黨以衆爲勝今則求
勝于內內爲之操其必勝而附內者復隨君子
而攻之以攻之之道爲附益內之通外外之通
內其名亦交相避也人心真不可方物事勢真
決裂而不可收拾奈何奈何知閩邸報日怵怵
拊心頓足者幾番也譚賀二君淡荷相知之雅
質雅正有執凝然君子譚氣鬼足當一面徐肩

虞直腸爽口無世俗闐然態弟甚嘉之而陳思
老以殿薦牘得無弟所嘉乃世所憎耶幸察之
牝牡驪黃之外卽年兄一見當快然無爾礙也
吳歷城以嚴爲治亦卽得力于嚴其材在用之
得當世烏可少若儔人也弟難乎免于今之世
太宰亦不鬱鬱久居此矣

甲子六月廿三日

答毛孺初

江南學院

知巧之士地有而能以其知巧舒寫於心於口
於手發爲文章新新無盡者必屬之吳以臺下

司衡其間則又今日之歐陽異日不問而知爲
安定先生之弟子也試牘之惠頗搔獵心適承
桐封之乏歸將與其子弟共讀之曰天下文章
莫大於是也

甲子六月廿三日

答祝東阿

名世美

向承數馬之乏夫亦曰會計當而已矣勢不得
以動支開銷之未明者而泛采風望爲薦牘光
抑不敢以動支開銷之未明者而遂爲州縣累
小疏固自明也承教及之瑣瑣以對鼎臆不敢

承藉手附壁伏祈崇亮

甲子六月廿五日

答馮景魯

真定守

每承芝宇如坐春風退而自愧其鄙益自信其
難乎免于今之世也睽違既久尤悔日滋方懼
其見外于有道而不我遐棄耶譽望日隆不勝
浣慰弟麋鹿耳而胷之桎之不卽縱之長林豐
艸間必刀之俎之以益晝脯乎年兄何以策弟
甲子六月廿五日

答劉永城

名鏞

青役之牘無足重輕而高誼薄雲楨貺至再千
秋之雅寧用錢刀而勤勤爾爾也凡主盜者其
根深其徒多其援廣其蠹故不易除門下殫力
爲地方驅除丰稜截如矣虚心平氣而廉得其
情不難裁決也原貺順使附壁

甲子七月初一日

答曾敬雲。

世倚清議爲金城何遂有遐心于南山之南北
山之北乎顧所以命弟者淡矣攜琴呼鶴之時
雇買珠炊桂之念高情若此何敢自他二縑附

徃非以爲報亦以寄風期于戔戔也

甲子七月
初二日

答徐泰校

弟以其闔劣爲不知已者詬病爲知己憂乃彼
其之子悉其黨以圖弟而一無所徵實以爲案
或者其足以謝知己也弟惟不勝惻惻以與當
世之稱爲君子者言消言長以取戾弟蓋不知
其僞爲君子也彼其意以爲吾已繫籍君子矣
君子當不吾難獨無所以繫小人之心吾于君
子索壘抵瑕口誅筆伐斷斷其不少置而小人

之黨則聖者塗之毀者瑜之孳孳焉號于人登
用之而小人復爲吾難耶不惟不吾難也必且
交爲吾用吾于是可以極意于富貴之塗而無
少齟齬迺弟不知其爲僞君子而面所質簡所
託若與之齟齬焉者弟何能免于今之世也且
若屬又好爲訛言卽某人一疏而訛爲誰草之
訛爲誰商之不風而波譁傳遠邇大疏至而抄
叅者誰題覆者誰也訛言不止此此其一端矣
所幸若屬借媚竈之人工必勝之着天以此發

其醜尋多方以蓋其醜而初疏逗王安二字未
疏逗王體軋三字于以爲焔璫之孝子慈孫不
是過矣太宰疏及臺中公疏所得明 旨與兩
疏所逗如呼吸此不能欺千古之明眼也重以
人情多營弟性偏室每不能副其所自營與爲
其父兄子弟姻婭故舊營則世所稱爲君子者
微亦不能無營而弟又得罪于世所稱爲君子
者矣弟何能免于今之世而年臺過愛其愚欲
弟少畱此耶然弟必圖一風恬波淨之隙而後

爲乞身投閒之計非然者恐牽及其同我者與其異我者身將隱矣不敢作風波干世上也第不知機緣能湊否爾年臺疏爲天下大計何以掛賤姓名于齒牙浮丘出處誠關吾道盛衰弟則抱赧甚矣浮丘託筆致謝一切議論重荷護呵感之刺骨瑣瑣皆不敢以告人而不得不以百一鳴之年臺幸爲秘之聞弋者之慕之也

甲

子七月初三日

與張僞初

不書牘

從舉業得翁臺從籌遼得翁臺從講筵得翁臺
從封事得翁臺而竟於卓塵馬足間失翁臺也
竊不自意翁臺亦有鄙人之姓名於胷次敵同
年錢御冷道之爲詳已惠大刺種種踞而讀之
諸斷理經世之文咸具而按拍程古尤精佩服
佩服拙刺二種呈教則家世織屨之業云爾不
足當大觀也文貞之業大文定之德崇翁臺繼
起而三日新富有拭目俟之矣

甲子七月初三日

答郭臨胸 名人吉

時方厲更調之令獨不能已已于賢者而不佞
喜可知也顧何以一日之雅屢動注存耶再冒
不恭罪恐莫贖敬登台貺卽展候私勿謂是借
花之供而討其不虔幸甚

甲子七月初三日

上趙太宰

迴環思之既奉有不必會看之 旨須更着商

量否

甲子七月初五日

與康味澹

大水爲蓄民饑民溺且方千里何以通米何以

及貧何以弭盜知厯如傷之念正殷也練任鴻
書來頗嫌浙漕之遲而甚譽吾邑及平湖之委
想今歲更輕且熟矣尚當于便郵中道老父母
之德意于田公祖也

甲子七月初五日

答曹允晦

泰山其頽豈有若可似而形容叙述責不敢辭
顧何以扇履徵耶行畧未蒙見寄然弟亦當于
歸田時了此且無庸汲汲也姚公祖爽氣亮節
品旣不羣而片言定漕事之紛惑尤次骨載在

臨桑之末章矣

甲子七月初五日

與顏長康。

微一日之雅以穉兒相託得無首蒼不克爲懼
卽知愛不我過督其何能自安耶洙兒素于書
冊無緣強之徃徃掉頭不顧以其文義未浹意
思殊不懌也近來意思何如仰仗啓牖不淺初
衣得遂晤對有日不宣

甲子七月初六日

與朱未荻

弟捋虎鬚兄罹蜂蠆不堪相對寧堪相別耶兄

且日休弟且日憂兄又何以教弟也種種牢騷
不遑覩縷

甲子七月初六日

與彭讓木

以弟之寡昧而游于羿之彀中幾幸其免于今
之世耶台駕舍弟而去弟逾俚俚靡所適從矣
媚竈者聞喪不奔將 昭代典則所載荼毒朝
紳事旁票紅簽以進初疏逗安末疏逗乾皆以
爲焔瑞之孝子慈孫也太宰疏臺中公疏所得
兩 旨與二疏如呼吸豈非天奪其鑿耶時事

日非支撐無計卽青泉白石未知緣分如何也
甲子七月初六日

答惠元孺

進賢立幟于南新建行煬于北南昌旗鼓登壇
懷寧簧鼓感衆蠶郎播毒司隸恣讒新城寢卹
憾不釋然合朝野南北以甘心于吾黨而于不
肖尤毒所幸天奪其鑿工必勝之着借媚竈者
以呼吸帝座盡發其醜今且聞喪不奔彙二正
之季振瑾所以凌縉紳者旁貼紅簽以進而初

疏逗安末疏逗乾皆所以爲焔璫之孝子慈孫
也代之除疾于內導之流毒于外天祚 聖明
不忍過慮種種殘虐業已不可嚮邇矣台駕先
此西歸天畱一柱以支大廈于異日也千冀碩
果自愛 甲子七月初六日

答史無爲。名應選

齊年兄弟如雨如雲馬首風塵尚多睽左況其
如星如萍者乎情雖殷固無如其勢何也自辰
及子八年于茲聞問間如徒勤夢寐儀承教札

恍若聯牀第隻身京邸囊粟已饒且多悔多尤
不爲及夕之計不敢以珠桂塵遠念亮之

甲子

七月初六日

答春寰和宇兩宗侯

長安過從覆雨翻雲倏懌而相鬪倏惡而相矛
不可方物卽不肖奉使諸藩所觀王孫指不勝
屈辟如傾蓋逆旅出門轉盼已成路人何以數
勤兩宗侯之間訊無虛歲也尊貶不敢當又不
敢辭敬拜雙氈彰結襪之誼餘珍藉手附壁匆

勿申謝未罄鄙私

甲子七月初六日

答楊丹徒

名金遠

渡京口者數四而得臺下于耳辱在行艣而得
于目朝夕炎洲而得臺下精神性術之微人倫
萬殊行歸玉尺知炎洲必不以私樹人知臺下
必以其不負世道者不負炎洲也似葉之身不
日黃隕台旣之辱誼不敢拜然心載之矣

甲子

七月初八日

答汪蓬萊

名裕

邇來治狀稱最大都得之朝貴之口與其鄉紳
與其上官而不必得之小民之心若官多軍多
馬多遼民之僑寓多事繁費廣志疑氣駭卒泰
易擾也僕所以傾耳于二如傾心于門下也寸
心苟一不在錢刀何以曩日之不恭見討而更
勤厚貺耶隆誼不敢違初意亦未敢變也順使
附壁不盡惓惓

甲子七月初八日

答李太康

名之茂

俄而見銓曹之啓事俄而接年兄之手書俄而

見當事之奏牘動之不可不慎也如是夫此必有以愛年兄誤年兄者此誤無損于年兄但時不得不少俟也台貺附璧

甲子七月初八日

答李燦岩

甘肅撫院

勞賢者于巖疆巖疆得人矣所憑左右手者二三司道而推者不赴任者旋行固知台臺之獨賢也偶晤大司寇謂台臺微亦有獨賢之感夫賢者政爲人所難耳膂力方剛伏惟爲巖疆珍

重

甲子七月初八日

答練任鴻

禮院

弟以圖劣循次處非其據賄賂信信咸其自取
惟彼中極意捃摭而無一罪案可指則弟所以
對知己也媚竈者言安言乾爲之除疾而聞計
不奔日檢振瑾故事施旁簽以進更造自官圖
導之流毒朝士引爲同室室中可有此人耶漕
事旣阻于回空之遲又爲濫雨所苦事勢本多
窒礙乃旂軍徃徃挾過淮過洪之悞以脅上人
之左袒我而虐民此其弊不可不察也湖郡畱

漕作賑之議發自何人若敝邑則儲粟以待久
矣一一商之王葱老必同心共濟也獨來歲無
粟抑且無民卽巧婦難炊耳憑限命之矣當卽
奉行但弟黃隕有日耳

甲子七月初八日

答高簡廷

并肅按院

繡黼所巡古張掖酒泉諸郡其稍東趙營平馬
伏波之經營在焉地利饒衍今當不異于古所
云部中左番右達撫輯虞疎而漢中襟喉巴蜀
套酋闌入綏延且望河西如左右手京遼之急

亦未聞置爲遠水而遂不以汲也山河兩界之
首譬諸建瓴此居其脊重以閎畧居高而倡寧
獨一隅厦庇而已乎

甲子七月初八日

答孫拱陽

陝西撫院

若曹正欲以汪文言爲阱于國中耳茲時皇極
不可嚮邇萬屯郎斃杖下矣汪林生死未卜左
浮老屢奉 溫綸而拂衣之志猶堅不肖將安
所處焉景翁懋翁蓬翁三先生至元氣便覺旁
皇盼翁臺之來尤亟也貴鄉獨賴有令弟耳望

之望之

甲子七月初九日

答方旦心

春初襄明丈日趣不肖爲老公祖計弛擔而不肖不忍也不忍赤子之失乳而震鄰之警尚號號而未定也既不肖圖加台銜以久于吾郡而襄明丈又不之許也萬不獲已而借寇之圖始不勝其推轂之念以爲一江之隔猶其在宇下耳然而非不肖初心矣私嘗謂人必不失其本心而後可以論品故身不敢鄉愿自爲而世

之爲鄉愿者亦不甚取何則謂似已稍失其本
心也老公祖以爲如何劉再翁公祖俄有閩轄
之轉方計挽之而尊教下及今亦第獲遂鄙懷
而已恐非劉公祖心也便問祈爲轉致一申其

愚

甲子七月初九日

答孫若英

朝事如此致身無地而閱過從儼說話復黜人
不休雖病甚不肯捨也林君本許改憑而曩不
見教近爲改憑者纏擾不了已出示矣雖敝衙

門諸兄弟求改者一切不敢從林君來又遲也
用印必須胥吏出示後而覲顏向渠索印恐非
體弟亦無此面孔矣罪罪